

## 隨筆集

### 遊朱銘美術館

犖确縱橫草自茵，工雕造化度凡塵。  
斧鑿頑石陶靈性，刀琢枯材得妙春。  
勢劈古今形意動，氣流天地歲時陳。  
千尊望盡森羅相，一悟明心返璞真。

### 詠鍾理和

風雨霜毫耕笠山，寒窗殘夢幾時還。  
螢書稼穡甘嘔肺，鴻逸蒿萊未改顏。  
鵲血到枯啼萬卷，鴛衾耐冷歷千關。  
清風捲頁馨香起，黃蝶翩生舞爛斑。

### 遊金瓜石黃金博物園區

煙雨留連舊宅清，殘車斷軌續遺情。  
離離草露侵神社，杳杳跫音沒礦坑。  
賓館櫻飄羅綺淡，山城夕返海天明。  
瀑泉猶戀淘金夢，篩遍流光萬點瑩。

### 友人惠草山柑

憶昔相逢芒浪中，今朝惠橘慶梅紅。  
蕙心招蝶香殊遠，嬌態承霖韻更豐。  
羞卻金羅驚璀璨，細分晶瓣濺玲瓏。  
草山冬日君情照，顆顆鮮甜染赤衷。

### 覽台北偶戲館

金光幻影演千秋，方寸江湖情自投。  
恩怨浮沈絲上引，風雲翻覆掌中收。  
幾廂槐夢縈瑤管，滿座春熙發彩樓。  
莫嘆塵間芻偶戲，天生萬物本無求。

彩樓：布袋戲演出的戲台型式。

## 覽郵政博物館

處處青衫綿邈留，傳書僕僕寫春秋。  
烽台難遞千金笑，驛壁長題萬里愁。  
雁素天涯披露送，鵝毛煙海理絲收。  
舊郵風月馳心付，箋捲霜塵情未休。

## 品小籠包

籠蓋平掀起霧紗，團團仙使出煙霞。  
嫩如春水生漣褶，巧似晨鐘醒食家。  
筍腹微隆盈膾炙，雪肌輕捻瀉芳華。  
懷瑜無意求榮顯，眾口稱香播遠涯。

## 遊國立故宮博物院

背負名山殿宇雄，千秋瑰寶一時逢。  
宋瓷猶泛仙儒氣，周鼎未銷王霸風。  
金碧山河思謝屐，琳琅器玩嘆吳宮。  
洪流不滅松煙韻，笑拈毫箋留雪鴻。

## 貓空夜飲鐵觀音

貓空竹浪話茶甌，語燦乳花翻未休。  
波挹斗杓雲腳漲，色溶河漢月華浮。  
甘滋醒綻千星夜，芳馥飄收一桂秋。  
文火慢煎深契味，絲絲情韻暖喉留。

## 嘗深坑臭豆腐

薰天煙幕蓋街坊，方寸柔軀氣正狂。  
不顧俗流標獨臭，甘居鹵水蘊幽芳。  
千磨玉髓融酥膩，百炸金袍爆辣香。  
食界別開新思味，佳評嫌語笑何妨。

## 士林夜市嘗大餅包小餅

燈火初明車馬麟，眾饕翹首顧頻頻。  
餡由雷槌敲酥脆，皮化春雲捲滿勻。  
大小雙全層疊變，鹹甜各妙味紛陳。  
薰陶一襲芝蘭氣，爲饗士林甘碎身。

## 遊樟樹步道

夾道透新涼，春風入茗香。  
楓亭臨疊翠，土厝倚斜芳。  
橘柚薰林馥，魯冰染圃黃。  
清芬來蝶影，蔭下侶羲皇。

## 訪指南宮

瓊宮聳峻巍，金碧耀雲霏。  
紫氣沖琳宇，青山映瑣闈。  
川廊千畫展，玉殿萬燈輝。  
仙道隨煙裊，紅塵幾許微。

## 詠葉石濤

寒蟬響未沉，高致發幽林。  
欲做文學鬼，長懷鄉土心。  
春秋豪筆述，風雅俚言吟。  
露重猶孤進，情鳴根地深。

## 詠高雄不老溫泉

心熱秉真純，殷勤滌世塵。  
何疑泉不老，樂助自回春。